

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Naalakkersuisut Kalaallit Nunaanni pissutsit aallaavigalugit utoqqalinersiaqalernissamut ukiorititanik misissueqqissaarnissamik kiisalu ukiorititat aalajangersarneqartarnissaannut siunissamilu naleqqussarneqartarnissaannut Kalaallit Nunaannut naleqqussakkamik periutsimik kingusinnerpaamik UPA 2028-mi siunnersuuteqarnissamik peqquneqarnissaannik Inatsisartut aalajangiiffigisassaattut siunnersuut.** (Inatsisartunut ilaasortaq Isak Johannessen, Naleraq)

**Tunngavilersuut:**

Utoqqalinersiaqarneq pillugu Inatsisartut inatsisaat atuuttoq naapertorlugu utoqqalinersiaqalernissamut ukiorititaq 67-iuvoq. Taamaattorli qinnuteqartoqarneratigut inunnut, minnerpaamik ukiuni 35-ini timikkut tarnikkulluunniit oqimaatsumik suliaqarnermikkut nungullarsimasunut sulii suliffeqarnermut attuumassuteqartunut, utoqqalinersiaqalernissamut ukiorititaq 65-iussasoq kommunalbestyrelsip aalajangersinnaavaa.

Periarfissaq taanna takutitsivoq Kalaallit Nunaanni inatsimmi atuuttumi sivisuumik oqimaatsumillu suliaqarsimanerup suliffimmit qaqugu tunuarnissaq eqqarsaatigalugu pingaaruteqarsinnaanera akuerineqareersoq. Taannali ataasiakkaanut immikkut periarfissaavoq, utoqqalinersiaqalernissamullu ukiorititat nalinginnaasut siunissamilu qanoq naleqqussarneqartarnissaat pillugit tunngaviit suut atorineqartariaqarnerut tamakkiisumik akissutissarsitsinngilaq.

Danmarkimi utoqqalinersiaqalernissamut ukiorititat siunissami allanngortinneqartarnissaat inatsisitigut innuttaasut inuuneqqortusiartornerannut attuumassuteqarpoq. Siunnersuutip siunertarinngilaa Danmarkip ilusiliaa Kalaallit Nunaannut nuunneqassasoq, kisianni utoqqalinersiaqalernissamut ukiorititat inuiaqatigiinni atuuffigisassaanni pissutsinik naleqquttunik ersarissunillu tunngaveqartariaqarnerat erseqqissassallugu.

1. Naatsorsuutigineqartumik inuuneqqortussuseq aamma utoqqalinersiaqalernissamut ukioqalernerup kingorna inuunerup qanoq sivilutigisumik ingerlaannarnissaa naatsorsuutigineqarsinnaanersoq, suaassuseq nunallu immikkoortui eqqarsaatigalugit assigiinngissutsit ilanngullugit.
2. Suliffeqarnermi katitigaanera, ukiuni qassini timikkut tarnikkulluunniit oqimaatsumik suliaqarsimanerup annertussusia kiisalu nungullarsimaneq pissutigalugu 65-inik ukioqarluni utoqqalinersiaqalersinnaanermut periarfissaq atuuttoq pillugu misilittakkat.

3. Innuttaasut peqqissusaat, nunap immikkoortuini assigiinngissutsit kiisalu peqqinnissaqarfimmit sullinneqarnissamut periarfissat assigiinnginnerisa pingaarutaat.
4. Aaqquissuussinerit assigiinngitsut sulisinnaasut amerlassusaannut, pisortat aningaasaqarnerannut kiisalu utoqqalinersiaqartitsinermut aaqquissuussinerup siunissami attanneqarsinnaaneranut kingunerisinnaasaat.

Kalaallit Nunaanni Naatsorsueqqissaartarfiup paasissutissaani toqusoqartarnerup nunap immikkoortuini assigiinngissuteqarnera ersepoq. Tamanna nuna tamakkerlugu agguaqatigiissitsinerit kisimik innuttaasut Kalaallit Nunaanni sumiiffinni assigiinngitsuni inuunerminni sulinerminnilu atugaat pillugit naammattumik takutitsinngitsoorsinnaanerannik erseqqissaataavoq.

Taamaattumik tamakkiisumik misissueqqissaarnek utoqqalinersiaqalernissamut ukiorititat qaffanneqassanersut apparsarneqassanersulluunniit kisiat apeqqutaatissanngilaq. Pissutsit suut tunngavigneqassanersut, qanoq uuttorneqarsinnaanersut kiisalu siunissami aaqquissuussineq isumaginninnikkut naapertuuttumik, aningaasaqarnikkut attanneqarsinnaasumik paasiuminartumillu qanoq ilusilernerqarsinnaanersoq misissorneqartariaqarpoq.

Peqatigisaanik inuiaqatigiinnut aningaasaqarnikkut kingunerisinnaasat ilanngullugit nalilersorneqarnissaat pingaaruteqarpoq. Utoqqalinersiaqalernissamut ukiorititat appasinnerusut pisortat aningaasartuutaannik qaffatsitsisinnaallutillu sulisinnaasut amerlassusaannik annikillisisisinnaapput, ukiorititali qaffasippallaat ukiuni amerlasuuni timikkut tarnikkulluunniit oqimaatsumik sulisimasunut artornarsinnaallutik. Siunnersuutikkut aalajangerneqanngilaq utoqqalinersiaqalernissamut ukiorititat nalinginnaasut apparsarneqassanersut, attatiinnarneqassanersut imaluunniit allatut naleqqussarneqassanersut. Siunertaavoq aalajangiinissaq Kalaallit Nunaanni pissutsinik takutitsisumik paasissutissanik uppersarneqarsinnaasunik tunngaveqarluni ingerlanneqassasoq.

Taamaattumik Naalakkersuisut utoqqalinersiaqalernissamut ukiorititat aalajangersarneqartarnissaannut siunissamilu naleqqussarneqartarnissaannut tunngaviit ersarissut Inatsisartunit politikkikkut nalilersorneqarsinnaasut pillugit ilusiliamik saqqummiussisariaqarput.

Assersuutigalugu aalisartutut, piniartutut, sanasutut imaluunniit allatigut timikkut tarnikkulluunniit oqimaatsumik inuussutissarsiuteqarluni sivisuumik sulisimaneq annikinnerusumik timikkut artornartumik suliffeqarnermut naleqqiullugu sulisinnaassutsimut allaanerumik sunniuteqarsinnaavoq. Peqatigisaanilli

utoqqalinersiaqartitsinermut aaqqissuussineq siunissami kinguaariinnut aningaasalersorneqarsinnaallunilu atuussinnaasariaqarpoq.

Siunnersuutip siunertaraa Inatsisartut utoqqalinersiaqalernissamut ukiorititat pillugit Kalaallit Nunaanni paasissutissat, inuuniarnermi atugassarititaasut inuiaqatigiinnullu piffissaq ungasinnerusoq eqqarsaatigalugu kingunerisinnaasat tunngavigalugit aalajangiisinnaanissaannut ataatsimoortumik suliamut tunngavissaqalersinneqarnissaat.

### **Pisortanut aningaasaqarnikkut allaffissornikkullu kingunerisassat**

Misissueqqissaarnerup tamakkiisup suliarineqarneranut paasissutissanik katersinermut, suliassa qarfiit akimorlugit misissueqqissaarinermit, suliffeqarnermi peqqissutsimilu pissutsinik naliliinermit kiisalu ilusiliat assigiinngitsut aningaasaqarnikkut kingunerisinnaasaannik naatsorsuinermit AC-fuldmægtigip ukioq ataaseq affarlu sulineranut naapertuuttumik isumalluutinik atuinissaq, tassa 750.000 kr.-it missaannik aningaasartuuteqarnissaq, naatsorsuutigineqarpoq.

### **Namminersorlutik inuussutissarsiortunut aningaasatigut allaffissornikkullu kingunerisassat**

Aalajangiiffigisassatut siunnersuut nammineq namminersorlutik inuussutissarsiortunut toqqaannartumik aningaasatigut allaffissornikkulluunniit kinguneqassasoq naatsorsuutigineqanngilaq, siunnersuut misissueqqissaarnerup ilusiliassallu suliarineqarnerannik taamaallaat imaqarami. Utoqqalinersiaqalernissamut ukiorititat kingusinnerusukkut allanngortinneqarnerisa kingunerisinnaasaat siunnersuummi kingusinnerusukkut saqqummiunneqartussami immikkut qulaajarneqartariaqarput.

### **Innuttaasunut aningaasaqarnikkut allaffissornikkullu kingunerisassat**

Aalajangiiffigisassatut siunnersuut nammineq innuttaasunut toqqaannartumik aningaasatigut allaffissornikkulluunniit kinguneqassasoq naatsorsuutigineqanngilaq. Innuttaasunut kingunerisinnaasat ilusiliap kingusinnerusukkut siunnersuutigineqarsinnaasup imarisai apeqqutaassapput, taamaattumillu immikkut qulaajarneqartariaqarlutik.